

ПОНЕДЕЛЬНИК ВЕЛИКОЙ СЕДМИЦЫ

Во Святый и Великий Понедельник Вечера,

По предначинательном псалме обычное стихословие: Ко Господу внегда скорбети ми, возвах: На Господи возвах, поставим стихов 10, и поем стихиры самогласны дне 4 по дважды, а два по единожды, глас 1:

Грядый Господь к вольней страсти, апостолом глаголаше на пути: се восходим во Иерусалим, и предастся Сын Человеческий, якоже есть писано о Нем. Приидите убо и мы, очищенными смыслом, спешествуем Ему, и сраспнемся, и умертвимся Его ради житием сластем, да и оживем с Ним, и услышим вопиюща Его: не кому в земный Иерусалим за еже страдати: но восхожду ко Отцу Моему и Отцу вашему, и Богу Моему и Богу вашему, и созовыщу вас в горний Иерусалим, в Царство Небесное. [Дважды.]

Глас 5: Достигше вернии спасительную страсть Христа Бога, неизреченное Его долготерпение прославим: яко да благоутробием Своим соведвигнет и нас умерщвленных грехом, яко Благ и Человеколюбец. [Дважды.]

Господи грядый к страданию, Твоя утверждая ученики, глагола еси особь прием их: како глагол Моих не помните, яже прежде рекох вам? Яко всякому пророку несть писано, токмо во Иерусалиме убиену быти. Ныне убо время настоет, еже рекох вам: се бо предаюся рукам грешных поруган быти, иже и Кресту Моему пригвоздивше, и погребению предавше, омерзена вменяют яко мертва. Обаче дерзайте, тридневен бо востану, в радость верных, и жизнь вечную. [Дважды.]

Господи, к таинству неизглаголанному Твоего смотра, не довлеющи сынов Зеведеовых мати, прошаше Тя, временнаго царства почести дароватися чадом ея: но вместо тоя, чашу смерти обещал еси пити другом Твоим: юже чашу прежде сих пити Сам глагола еси, грехов очищение. Темже Тебе вопием: спасение душ наших, слава Тебе. [Дважды.]

Господи, совершеннейшая мудрствовати, Твоя наказуя ученики, не уподобитися языком глагола еси, во еже обладати меньшими: не тако бо будет вам Моим учеником, яко нищий хотя есмь. Первый убо вас, да будет всем слуга: начальствуй же, яко начальствуемый: предызяцный же, яко последний. Ибо приидох Сам обнищавшему Адаму послужити, и избавление дати за многих душу Мою, вопиющих Ми: слава Тебе.

Глас 8: Изсохшия смоковницы за неплодие, прещения убоявшеся братие, плоды достойны покаяния принесем Христу, подающему нам велию милость.

Слава, и ныне, глас тойже:

Вторую Еву египтяныню обрет змий глаголы, тщашеся ласканьми запяти Иосифа: но той оставив ризу, бежа греха, и наг не стыдяшеся, якоже перевозанный прежде преслушания. Того молитвами Христе помилуй нас.

Таже вход со Евангелием. Свете тихий:

Прокимен, псалом 127. Глас 6: Благословит тя Господь от Сиона, и узриши благая Иерусалима.

Стих: Блажени вси боящиеся Господа, ходящие в путех Его.

Исхода чтение. [Глава 1, ст. 1 – 20.]

Сия имена сынов Израилевых, входящих во Египет вкупе со Иаковом отцем их, кийждо со всем домом своим внидоша: Рувим, Симеон, Левий, Иуда, Иссахар, Завулон и Вениамин, Дан и Неффалим, Гад и Асир: Иосиф же бяше во Египте. Бяше же всех душ изшедших из Иакова, семьдесят пять. Умре же Иосиф, и вся братия его, и весь род оный. Сынове же Израилевы возрастоша, и умножишася, и мнози быша, и укрепилася зело зело: умножи же их земля. Воста же царь ин во Египте, иже не знаше Иосифа. Рече же языку своему: се род сынов Израилевых великое множество, и укрепляется паче нас. Приидите убо прехитрим их, да не когда умножатся: и егда аще приключится нам брань, приложатся и сии к супостатом, и одолевше нам, изыдут из земли [нашея]. И пристави над ними приставники дел, да озлобят их в делех: и создаша грады тверды фараону, Пифо, и Рамесси, и Он, иже есть Илиополь. Поелику же их смиряху, толико множайшии бываху, и укрепляхуся зело зело. И гнушахуся египтяне сынами Израилевыми: И насилие творяху египтяне сыном Израилевым нуждею. И болезненну тем жизнь творяху в делех жестоких, брением, и плинфоделанием, и всеми делы, яже в полях, во всех делех, имиже поработяху их с нуждею. И рече царь египетский бабам еврейским: единой их имя, Сепфора, и имя второй, Фуа. И рече [им]: егда бабите евреаныням, и суть к рождению, аще убо мужеский пол будет, убивайте его: аще же женский, снабдевайте его. Убояшася же бабы Бога, и не сотвориша, якоже повеле им царь египетский, и живляху мужеский пол. Призва же царь египетский бабы, и рече им: что яко сотвористе вещь сию, и оживляете мужеский пол? Рекоша же бабы фараону: не яко жены египтяныни, тако и жены евреаныни: раждают бо прежде неже внити к ним бабам, и раждаху. Благо же творяше Бог бабам, и множахуся людие, и укрепляхуся зело.

Прокимен, псалом 128, глас 6: Благословихом вы во имя Господне.

Стих: Множицею брашася со мною от юности моея.

Иова чтение. [Глава 1, ст. 1 – 12.]

Человек некий бяше во стране Авситидийстей, емуже имя Иов: и бе человек он истинен, непорочен, праведен, Богочестив, удаляйся от всякия лукавья вещи. Быша же ему сынове семь, и дщери три. И бяху скоти его, овец семь тысяч, вельблюдов три тысячи: супруг волов пять сот, и ослиц пасомых пять сот, и слуг много зело, и дела велия бяху ему на земли: и бе человек оный благороднейший сущих от восток солнца. Сходящася же сынове его друг ко другу, творяху пир на кийждо день, споемлюще вкупе и три сестры своя, ясти и пити с ними. И егда скончавашася дние пира, послалше Иов и очищаше их, востая заутра: и приношаше о них жертвы по числу их, и тельца единого о гресе, о душах их. Глаголаше бо Иов: негли когда сынове мои согрешаша, и в мысли своей злая помыслиша противу Бога? Тако убо творяше Иов вся дни. И бысть яко день сей, и се приидоша ангели Божии предстати пред Господем: и диавол прииде с ними. И рече Господь диаволу: откуда пришел еси? И отвечава диавол Господеви, рече:

обшед землю, и прошед поднебесную се есмь. И рече ему Господь: внял ли еси мыслию твоею на раба Моего Иова? Зане несть яко он, на земли человек непорочен, истинен, Богочестив, удаляйся от всякия лукавья вещи. Отвеща же диавол, и рече пред Господем: еда туне Иов чтит Господа? Не Ты ли оградил еси внешняя его, и внутренняя дому его, и яже вне всех сущих его окрест? Дела же руку его благословил еси, и скоты его многи сотворил еси на земли. Но послы руку Твою, и коснися всех, яже имать: аще не в лице Тя благословит. Тогда рече Господь диаволу: се вся елика суть ему, даю в руку твою, но самого да не коснешися. И изыде диавол от Господа.

Таже, Да исправится молитва моя:

И посем Евангелие от Матфея, зачало 98. [Мф. 24, 3 – 35.]

Во время оно, сядящу Иисусу на горе Елеонстей, приступиша к Нему ученицы на едине, глаголюще: рцы нам, когда сия будут? И что есть знамение Твоего пришествия и кончина века? И отвещав Иисус рече им: блюдите, да никтоже вас прельстит. Мнози бо приидут во имя Мое, глаголюще: Аз есмь Христос, и многи прельстят. Услышати же имате брани и слышания бранем. Зрите, не ужасайтесь, подобает бо всем сим быти, но не тогда есть кончина. Восстанет бо язык на язык, и царство на царство, и будут глади и пагубы и труси по местом, вся же сия начало болезнем. Тогда предадут вы в скорби и убьют вы, и будете ненавидими всеми языки имене Моего ради. И тогда соблазнятся мнози, и друг друга предадут, и возненавидят друг друга, и мнози лжепророцы востанут и прельстят многия, и за умножение беззакония, изсякнет любы многих. Претерпевый же до конца, той спасется. И проповестся сие Евангелие Царствия по всей вселенней, во свидетелство всем языком, и тогда приидет кончина. Егда убо узрите мерзость запустения, реченную Даниилом пророком, стоящу на месте святе, иже чет, да разумеет, тогда сущии во Иудей да бежат на горы, и иже на крове, да не сходит взяти яже в дому его, и иже на селе, да не возвратится вспять взяти риз своих. Горе же непраздным и доящим в тыя дни. Молитесь же, да не будет бегство ваше в зиме, ни в субботу. Будет бо тогда скорбь велия, якоже не была от начала мира доселе, ниже имать быти. И аще не быша прекратилися дние оны, не бы убо спаслася всяка плоть, избранных же ради прекратятся дние оны. Тогда аще кто речет вам: се, zde Христос, или онде, не имите веры. Восстанут бо лжехристи и лжепророцы и дадут знамения велия и чудеса, якоже прельстити, аще возможно, и избранныя. Се, прежде рех вам. Аще убо рекут вам: се в пустыни есть, не изыдите, се в сокровищих, не имите веры. Якоже бо молния исходит от восток и является до запад, тако будет пришествие Сына Человеческаго, идеже бо аще будет труп, тамо соберутся орли. Абие же, по скорби дний тех, солнце померкнет, и луна не даст света своего, и звезды спадут с небесе, и силы небесныя подвижутся, и тогда явится знамение Сына Человеческаго на небеси, и тогда восплачутся вся колена земная и узрят Сына Человеческаго грядуща на облацех небесных с силою и славою мноюю, и послет Ангелы Своя с трубным гласом велиим, и соберут избранныя Его от четырех ветр, от конец небес до конец их. От смоковницы же научитесь притчи: егда уже ваия ея будут млада, и листвие прозябнет, ведите, яко близ есть жатва. Тако и вы, егда видите сия вся, ведите, яко близ есть, при дверех.

Аминь глаголю вам, не мимоидет род сей, дондеже вся сия будут, небо и земля мимоидет, словеса же Моя не мимоидут.

И прочее последование Преждеосвященных, по обычаю. Тако долженствует быти и в Великий Вторник, и в Великую Среду.

Аще же несть Преждеосвященныя: Поем на Господи воззвах, половину от стихир, на 6. Стихира, глас 1: Грядый Господь к вольной страсти: дважды. Достигше вернии: дважды. Господи, к таинству неизглаголанному: дважды. Слава, и ныне: Господи грядый к страданию: По сих вход с Евангелием: и Свете тихий: Таже прокимен, и паремии, и Евангелие. Таже, Сподоби Господи: И ектения: Исполним вечернюю: На стиховне, от техже стихир, стихира, глас 5: Господи совершеннейшая мудрствовати: Стих: К Тебе возведох очи мои: И паки туюжде стихиру. Стих: Помилуй нас Господи: Глас 8: Изсохшая смоковницы: Слава, и ныне, глас тойже: Вторую Еву: Таже, Ныне отпускаеши: И прочая обычная с поклоны. И по конечном Трисвятом, и по Отче наш: Господи помилуй, 12. Таже, молитва, Всесвятая Троице: и Буди имя Господне: И отпуст.

Сице убо творим во Вторник и в Среду.

На трапезе же ядим сухоядение, и сим удовляемся. И якоже в первую неделю святого сего Поста: сице и в сия дни, в Великий Понедельник, во Вторник и в Среду поститися подобает.

Ведати бо подобает, яко и Шестый великий Собор повеле, спасительныя страсти дни в посте, и молитве, и умилении сердца сотворяти верным: в полунощи же Великия Субботы, оставяти пост, Божественным евангелистом Матфею и Луце: овому убо позде в субботу глаголанием, овому же утром глубоким, меддемое нам ноци написующим.

Во Святыи И Великий Понеделник Вечера,

Повечерие глаголем великое, на Повечерии трипеснец господина Андреа Критскаго. Глас 8.

Песнь 2.

Ирмос: Вонми небо и возглаголю, * и воспою Христа, * от Девы рождагося * во спасение наше.

Пойдем со Христом к горе Елеонстей, тайно со апостолы соводворимся Ему.

Разумей смиренное мое сердце, что есть жерновная притча? О нейже прежде рече Христос, и истрезвися прочее.

Готови сама себе о душе моя, ко исходу: пришествие приближается неумолимаго Судии.

Богородичен: Пречистая Богородице Дево, едина всепетая, Сына Твоего моли о рабех Твоих.

Ин, глас тойже.

Ирмос: Видите, видите, яко Аз есмь Бог, * древле Израиля сквозе Чермное море проведый, * и питавый, и спасый, * и от горькия работы * свободивый фараоновы.

Видите, видите, яко Аз есмь Бог, Иже прежде бытия всех, и прежде сотворения земли и неба, вем вся: и весь сый во Отце, и всего ношу в Себе.

Словом составих небо вкупе и землю: со Отцем бо бех, и словом ношу вся, яко Слово, мудрость, и сила, и образ, и содействителен, и равнодетелен.

Кто времена положи? Кто веки соблюдаяй? Кто вся определяяй и совоздвигааяй? Разве Безначальный присно сый со Отцем, якоже заря во свете.

О безмернаго Твоего человеколюбия Иисусе! Сказал бо еси нам скончания свыше время, скрыв час, уяснив же светло образы его.

Вся веси, вся знаеши Иисусе яко имеяй все в Себе Отеческое достояние Божественне, и всего Духа всаждена носяй в себе, соприсносущнаго Отцу.

Владыко Господи, веков творче, сподоби и нас священный оный тогда глас услышати, зовущий избранныя Отца в Царство Небесное.

Слава: Безначальная, несозданная Троице, нераздельная Единице, трое сушая и едино, Отче, Сыне и Душе, единый Боже, прими пение от бранных язык, якоже от уст пламенных.

Богородичен: Селение святое явилася еси Дево Божие: в Тя бо Небесный Царь вселився плотию, пройде красный, человека в Себе вообразив Божественне.

Седален, глас 2.

Подобен: Милосердия суци:

Милосердием движимь Христе, * волею предыдеши страдати благодетелю, * хотяй страстей нас избавити, * и еже во аде осуждения. * Темже честная Твоя воспеваем страдания, * и славим Спасе, * крайнее твое вси схождение.

Песнь 8.

Ирмос: Ангели и небеса, * на престоле славы сидягаго * и яко Бога непрестанно славимаго, * благословите, пойте * и превозносите его во веки.

Всяко слышала еси душе, како Христос Божественным учеником Своим провозглашаше, глаголя скончание: разумевши же Твой конец, уготовися прочее: время исхода прииде.

Познала еси неплодная душе, лукаваго раба притчу, бойся и не небрези о даровании, егоже прияла еси, да не сокрыеши в землю, но да куплю дееши.

Да уяснится свеща, да преизлиется сея и елей, якоже девам тогда сострадание, да обрящеши душе моя чертог Христов тогда отверстый.

В субботу бегство и в зиме глаголя Учитель, седмаго бурю предгадательствует настоящего века, в немже найдет яко зима кончина.

Яко скорость молнии преходящая, тако тогда будет страшное оное Владыки твоего пришествие, душе моя: слышала еси, готова прочее быти потщися.

Егда приидет Судия с тысящами, и тьмами ангельских чинов и сил, тогда кий страх душе моя, кий трепет, увы мне! Нагим стоящим всем.

Благословим Отца, и Сына, и Святаго Духа, Господа.

Един Бог убо Троица, ни Отцу изступившу в сыновство, ниже Сыну пременившуся во исхождение, но свойственная, и обое Свет, Бога, Три славлю во веки.

И ныне, Богородичен: Молитвами Боже, Богородицы, прими молитву нашу, возниспосли же милости Твоя на вся богато, и мир Твой подаждь людем Твоим.

Хвалим, благословим, покланяемся Господеву, поюще и превозносяще во вся веки.

Ирмос: Ангели и небеса, * на престоле славы сидящего * и яко Бога непрестанно славимаго, * благословите, пойте * и превозносите его во веки.

Песнь 9.

Ирмос: Проявленное на горе законоположнику * во огни и купине, * Рождество Приснодевы, * в наше верных спасение, * песнями немолчными величаем.

Слышала еси душе моя, Судии предвозглашающую, и учащу тя време кончины: готови яже на исход дела, да не яко неискусна, Бога овержена будеши.

От смоковницы о душе моя, научися кончины! Егда младо будет листовие, и прозябнет ветвие, жатвы час прочее, и ты егда сия увидиши, разумей, яко при дверех есть.

Кто разве Тебе иной Твоего знает Отца? Или кто кроме Тебе весть час, или день? У Тебе бо сокровища премудрости вся внутри суть, Христе Боже.

Книги убо разгнутся тогда, престолом поставленным, деяния же обличатся, нагим стоящим всем: ни свидетелем, ни клеветником присутствующим: обнажена бо вся Богу.

Грядет всех Судия, изведен быти на суд, на престоле херувимсте седяй, яко повинный предстати Пилату, и вся пострадати, да спасется Адам.

Приблизися Пасха нам великая и Божественная: по двою бо дню преднаучает Христос, страдания прописуя день, вонже Отцу жертва приведется.

При Кресте Твоем Спасе предстоящи Мати, и Твое несправедное зрящи заклание, вопияще: увы Мне Чадо Мое! Увы Мне незаходимый свете! Просияй всем Солнце славы свет.

Слава: **О** единиче Святая, Троице едино Божество, и Троица Единиче Боже, триипостасное Естество, единичестная, и нераздельная славо, избави от бед души наша!

И ныне, Богородичен: **П**риими Матерь Твою Христе в молитву, да молитвами Ея умириши мир, и утвердиши царствия скиптры, и Церкви Твоя совокупиши во едино.

Ирмос: **П**роявленное на горе законоположнику * во огни и купине, * Рождество Приснодевы, * в наше верных спасение, * песнями немолчными величаем.

Достойно: **И** поклон до земли.

Трисвятое. **И** по Отче наш: **К**ондак дне. **Т**аже, **Г**осподи сил с нами буди: **И** прочее обычное. **И** отпуст.

ВТОРНИК ВЕЛИКОЙ СЕДМИЦЫ

Во СВЯТЫЙ и ВЕЛИКИЙ ВТОРНИК НА УТРЕНИ

Аллилуиа, на глас 8. Тропарь Се Жених грядет:

Се Жених грядет в полунощи, * и блажен раб, егоже обрящет бдяща: * недостойн же паки, егоже обрящет унывающа. * блюди убо душе моя, * не сном отяготися, * да не смерти предана будещи, * и Царствия вне затворишися, * но восприяни зовущи: * Свят, Свят, Свят еси Боже, * Богородицею помилуй нас. **[Трижды.]**

И обычное стихословие:

По 1-м стихословии седален, глас 4.

Подобен: Вознесыйся на Крест:

Жениха братие возлюбим, * свечи своя украсим, * в добродетелех сияюще и вере правой: * да яко мудрыя Господни девы * готови внидем с Ним на браки: * Жених бо дары, * яко Бог всем подает нетленный венец.

Слава, и ныне, тойже.

По 2-м стихословии седален, глас 4.

Подобен: Удивися Иосиф:

Совет Спасе беззаконный на Тя, * священницы и книжницы завистию собравше люте, * в предательство подвигоша Иуду: * темже безстыдно исхождаше, * глаголаше на Тя беззаконным людем: * что ми, глаголет, дадите, и аз вам Его предаю в руки ваша? * Осуждения сего избави Господи, души наша.

Слава, и ныне, тойже.

По 3-м стихословии седален, глас 8.

Подобен: Премудрости:

Иуда разумом сребролюбствует, * на Учителя враждебно подвизается, * советует, поучается преданию, * света отпадает, тьму приим, соглашает цену, * продает Безценнаго: * темже и удушение, возмездие еже содея, * обретает окаянный, и лютую смерть, * предав Тебе Господа. * Того нас части избави Христе Боже, * прегрешений оставление даруя, * празднующим верою пречистую страсть Твою.

Слава, и ныне, тойже.

Таже, И о сподобитися нам: Евангелие от Матфея

Евангелие от Матфея, зачало 90. [Мф. 22, 15 – 23, 39.]

Во время оно, совет приемше вси фарисее на Иисуса, яко да обольстят Его словом, посылают к Нему ученики своя со иродианы, глаголюще: Учителю, вемы, яко истинен еси, и пути Божию воистинну учиши, и нерадиши ни о комже, не зриши бо на лице человеком, рцы убо нам, что Ти ся мнит? Достойно ли есть дати кинсон кесареви, или ни? Разумев же Иисус лукавство их, рече: что Мя искушаете, лицемери? Покажите Ми златицу кинсонную. Они же принесоша Ему пенязь. И глагола им: чий образ сей и написание? И глаголаша Ему: кесарев. Тогда глагола им: воздадите убо кесарева кесареви, и Божия Богови. И слышавше дивишася, и оставльше Его отидоша. В той день приступиша к Нему саддукее,

иже глаголют не быти воскресению, и вопросиша Его, глаголюще: Учителю, Моисей рече, аще кто умрет не имый чад, да поймет брат его жену его и воскресит семя брата своего. Беша же в нас семь братия, и первый оженъся умре, и не имый семене, остави жену свою брату своему, такожде же и второй, и третий, даже до седмаго, последи же всех умре и жена. В воскресение убо, котораго от седмих будет жена? Все бо имеша ю. Отвещав же Иисус рече им: прельщаетеся, не ведуще Писания, ни силы Божия. В воскресение бо ни женятся, ни посягают, но яко Ангели Божии на небеси суть, о воскресении же мертвых несте ли чли реченнаго вам Богом, глаголющим: Аз есмь Бог Авраамов, и Бог Исааков, и Бог Иаковль? Несть Бог Бог мертвых, но Бог живых. И слышавше народи дивляхуся о учении Его. Фарисее же слышавше, яко посрами саддукеи, собрашася вкупе. И вопроси един от них законоучитель, искушая Его и глаголя: Учителю, кая заповедь больши есть в законе? Иисус же рече ему: возлюбиши Господа Бога твоего всем сердцем твоим, и всею душею твоею, и всею мыслию твоею. Сия есть первая и большая заповедь. Вторая же подобна ей: возлюбиши искренняго твоего яко сам себе. В сию обою заповедию весь закон и пророцы висят. Собравшымся же фарисеом, вопроси их Иисус, глаголя: что вам мнится о Христе? Чий есть Сын? Глаголаша Ему: Давидов. Глагола им: како убо Давид Духом Господа Его нарицает, глаголя: рече Господь Господеви моему, седи одесную Мене, дондеже положу враги Твоя подножие ногама Твоима? Аще убо Давид нарицает Его Господа, како сын ему есть? И никтоже можаше ответати Ему словесе, ниже смейше кто от того дне вопросити Его ктому. Тогда Иисус глагола к народом и учеником Своим, глаголя: на Моисеове седалищи седоша книжницы и фарисее. Вся убо, елика аще рекут вам блюсти, соблюдайте и творите, по делом же их не творите. Глаголют бо, и не творят, связуют бо бремена тяжка и бедне носима, и возлагают на плеща человеческа, перстом же своим не хотят двигнути их. Вся же дела своя творят, да видими будут человеки, расширяют же хранилища своя и величают воскрилия риз своих, любят же преждевозлегания на вечерях, и преждеседания на сонмищих, и целования на торжищих, и зватися от человек: учителю, учителю. Вы же не нарищайтесь учителями, един бо есть ваш Учитель, Христос, вси же вы братия есте. И отца не зовите себе на земли, един бо есть Отец ваш, Иже на небесех. Ниже нарищайтесь наставницы, един бо есть Наставник ваш, Христос. Болий же в вас да будет вам слуга, иже бо вознесетя, смиритя, и смиряйся вознесетя. Горе вам, книжницы и фарисее, лицемери, яко затворяете Царствие Небесное пред человеки, вы бо не входите, ни входящих оставляете внити. Горе вам, книжницы и фарисее, лицемери, яко снедаете дома вдовиц, и виною далече молитвы творяще, сего ради лишнее примете осуждение. Горе вам, книжницы и фарисее, лицемери, яко преходите море и сушу, сотворити единаго прищелца, и егда будет, творите его сына геенны сугубейша вас. Горе вам, вожди слепии, глаголющии, иже аще кленетя церковию, ничесоже есть, а иже кленетя златом церковным, должен есть. Буи и слепии, что бо более есть, злато ли, или церковь, святящая злато? И иже аще кленетя олтарем, ничесоже есть, а иже кленетя даром, иже верху его, должен есть. Буи и слепии, что бо более, дар ли, или олтарь, святяй дар? Иже убо кленетя олтарем, кленетя им и сущим верху его, и иже кленетя церковию, кленетя ею и Живущим в ней, и кленыйся небесем кленетя Престолом Божиим и Сядящим на

нем. Горе вам, книжницы и фарисее, лицемери, яко одесятствуете мятву и копр и кимин, и остависте вящшая закона, суд и милость и веру, сия же подобаше творити, и оных не оставяти. Вожди слепии, ожеждающии комары, велблуды же пожирающе. Горе вам, книжницы и фарисее лицемери, яко очищаете внешнее сткляницы и блюда, внутрьуду же суть полни хищения и неправды. Фарисее слепый, очисти прежде внутреннее сткляницы и блюда, да будет и внешнее има чисто. Горе вам, книжницы и фарисее, лицемери, яко подобитесь гробом повапленным, иже внеуду убо являются красны, внутрьуду же полни суть костей мертвых и всякия нечистоты. Тако и вы, внеуду убо являетесь человеком праведни, внутрьуду же есте полни лицемерия и беззакония. Горе вам, книжницы и фарисее, лицемери, яко зиждете гробы пророческия, и красите раки праведных, и глаголете: аще быхом были во дни отец наших, не быхом убо общницы им были в крови пророк. Темже сами свидетелствуете себе, яко сынове есте избивших пророки, и вы исполните меру отец ваших. Змия, порождения ехиднова, како убежите от суда огня геенскаго? Сего ради, се, аз пошлю к вам пророки и премудры и книжники, и от них убиеете и распнете, и от них биете на сонмищих ваших, и изменете от града во град, яко да придет на вы всяка кровь праведна, проливаемая на земли, от крове Авеля праведнаго до крове Захарии сына Варахиина, егоже убисте между церковию и олтарем. Аминь глаголю вам, яко приидут вся сия на род сей. Иерусалиме, Иерусалиме, избивый пророки и камением побиваяй посланныя к тебе, колькраты восхотех собрати чада твоя, якоже собирает кокош птенцы своя под криле, и не восхотесте? Се, оставляется вам дом ваш пуст. Глаголю бо вам, яко не имате Мене видети отселе, дондеже речете: благословен Грядый во имя Господне.

Посем псалом 50. Таже, Спаси, Боже, люди Твоя: Господи помилуй, 12. Посем ектенна малая.

Таже кондак, глас 2.

Подобен: Вышних ища:

Час душе конца помысливши, * и посещения смоковницы убоявши, * данный тебе талант трудолюбно делай окаянная * бодрствующи и зовущи: * да не пребудем вне чертога Христова.

Икос: **Что** унываеши душе моя окаянная? **Что** мечтаеши безвременно попечения бесполезная? **Что** упражняеши к мимотекущим? Последнейший час есть отселе, и разлучитися имамы от сущих zde. Дондеже время имаши, возникни зовущи: согреших Ти Спасе мой не посецы мене якоже неплодную смоковницу, но яко благоутробен Господи, ущедри со страхом зовущую: да не пребудем вне чертога Христова.

Синаксарь. Стихи:

Стих: Вторник величайший дев десять носит,

Стих: Победу носящих неумытнаго Владыки.

Во Святый и Великий Вторник, десяти дев притчи память творим: зане таковыя притчи, восходя во Иерусалим Господь, на страсть грядый, Своим глаголаше учеником: суть же притчи, яже и ко иудеем простираше. Десяти убо дев притчу на милостыню обращающа рече, вкупе и уча, еже прежде конца всем готовым

быти. Зане о девстве много тем сказоваше, и о скопцех: многую же и славу девство имать, велико бо есть яко воистинну. Но да не кто сие дело исправляя, небрежет о других, паче же о милостыни, еже свеща девства просвещается, вводит священное Евангелие притчу сию: и пять убо мудрых наричет, яко с девством и многий и богатый милостыни елей приложивших: и пять же буйих, яко и тех девство убо имущих, милостыню же несравненну. Сего бо ради буйя, зане большее исправивше, о меньшем же небрегоша, и ничтоже блудниц разнствоваху: яко они убо телесы, сия же имении побеждени быша. Нощи же настоящего жития мимотекущей, воздремашася вся девы, сиесть, умроша: сон бо смерть глаголется. И спящим им, вопль посреди нощи бысть, и овы убо обильно елей приложившия, дверем отверзшимся, внидоша с Женихом. Буйя же недовольный елей имущия, по сне искаху его. Но мудрыя хотевшия убо дати, не могшия же, прежде вшествия отвещаша глаголюще: еда когда не удовлеет нам и вамъ? Идите к продающим, сиесть, убогим, и купите: но неудобно, по смерти бо сие не возможно. Еже и о богатом и Лазаре показывает Авраам, глаголя: нужда убо преходити отсюда тамо. Но буйя пришедши непросвещены, сице вопиют, во врата ударяюще: Господи, Господи, отверзи нам. Сам же Господь Собою страшный оный ответ дает: отыдите, рек, не вем вас. Како бо аще увидите Жениха вена не имущия, милостыни самыя? Сего убо ради образа притча десяти дев, зде положена быти богоносными отцы учинися, наказующая нас присно бдети, и готовым быти к сретению истиннаго Жениха, благими деянии, паче же милостынею: зане безвестен день и час кончины: якоже и Иосифом целомудрие стяжати, и смоковницею присно плод духовный предлагати. Иже бо дело единое и пребольшее убо яве делает, о других же небрежет, паче же о милостыни, не входит со Христом в вечное упокоение, но возвращается вспять посрамлен. Ничтоже бо печальнейше, и срама исполненнейше, якоже девство побеждаемое именем. Но о Женише Христе, с мудрыми нас сочetaй девами, и избранному Твоему сопричти стаду, и помилуй нас, аминь.

Таже двоепеснец, егоже краестрочие: Трити те, сиесть, во вторник же. Творение господина Космы, ирмос по дважды, стихи же на 12. Последи же ирмос, оба лика вкупе.

Песнь 8. Глас 2.

Ирмос: Велению мучителеву * преподобнии трие отроцы не повинувшеся, * в пещь ввержени, * Бога исповедаху поюще: * благословите дела Господня Господа.

Леность далече нас отвержим, и светлыми свещами безсмертнаго Жениха Христа пением усрящим, благословите, вопиюще, дела Господня Господа.

Да удовлеет общительный души нашея елей в сосудех, яко да не на куплю положше время почестей, поем: благословите дела Господня Господа.

Талант елицы от Бога приясте, равносильную благодать, помощию давшаго Христа возрастите, поюще: благословите дела Господня Господа.

Хвалим, благословим:

Ирмос: Велению мучителю * преподобнии трие отроцы не повинувшися, * в пещь ввержени, * Бога исповедаху поюще: * благословите дела Господня Господа.

Честнейшую не поем.

Песнь 9.

Ирмос: Невместимаго Бога * во чреве вместившая, * и радость миру родившая, * Тя поем Богородице Дево.

Учеником Благий, бдите, рекл еси, вонже час приидет Господь, не разумеете, отдати комуждо.

Во втором Твоем и страшном пришествии Владыко, десным овцам мя сопричти, прегрешений презрев моих множества.

И паки вместо, Достойна, ирмос:

Ирмос: Невместимаго Бога * во чреве вместившая, * и радость миру родившая, * Тя поем Богородице Дево.

Ексапостиларий

Чертог Твой вижду, Спасе мой, украшенный, и одежды не имам, да вниду вонь: просвети одеяние души моя Светодавче, и спаси мя. [Трижды]

На хвалитех поставим стихов 4,

И поем стихиры самогласны повторяюще, глас 1:

Во светлостех святых Твоих, * како вниду недостойный? * Аще бо дерзну совнити в чертог, * одежда мя обличает, яко несть брачна, * и связан извержен буду от ангелов. * Очисти Господи, скверну души моя, * и спаси мя яко Человеколюбец. [Дважды.]

Глас 2: Душевною леностию воздремавша, * не стяжах Женише Христе, * горяща светильника иже от добродетелей, * и девам уподобихся буим, * во время делания глумляся. * Утробы щедрот Твоих не затвори мне Владыко, * но оттряс мой омраченный сон, * возстави, и с мудрыми введи девами в чертог * Твой, идеже глас чистый празднующих, * и воинопщих непрестанно: * Господи слава Тебе. [Дважды.]

Слава, и ныне, глас 4:

Скрывшаго талант осуждение слышавши, * о душе не скрывай словесе Божия, * возвещай чудеса Его, * да умножающе дарование, * внидеши в радость Господа твоего.

На стиховне стихиры самогласны, глас 6:

Приидите вернии, * делаим усердно Владыце: * подавает бо рабом богатство, * и по равенству кийждо да многоусугубим благодати талант: * ов убо мудрость да приносит дела благими, * ов же службу светлости да совершает. * Да приобщается же словом верный тайны ненаученному, * и да расточает богатство убогим другий: * сие бо заимованное многоусугубим, * и яко строителие вернии благодати, * Владычния радости сподобимся. * Тоя нас сподоби, Христе Боже, яко Человеколюбец.

Стих: **Исполнимся** завтра милости Твоя Господи:

Егда приидеши во славе * со ангельскими силами, * и сядеши на престоле, Иисусе, * разсуждения, да мя Пастырю Благий не разлучиши: * пути бо десныя веси, * возвращени же суть шуии. * Да не убо с козлищи грубаго мя грехом погубиши: * но десным мя сочетав овцам, * спаси яко Человеколюбец.

Стих: **И буди светлость** Господа Бога нашего на нас:

Женише, добротою * красный паче всех человек, * призывый нас к трапезе духовней чертога Твоего, * нелепый мой зрак прегрешений * совлецы причастием страданий Твоих, * и одеждою славы украсив Твоя красоты * собеседника светла мя покажи * Твоего Царствия, * яко Милосерд.

Слава, и ныне глас 7:

Се тебе талант Владыка вверяет душе моя, * страхом прими дар, * займствуй давшему, раздавай нищим, * и стяжи друга Господа, * да станеши одесную Его, * егда приидет во славе, * и услышиши блаженный глас: * вниди рабе в радость Господа твоего. * Тоя достойна мя сотвори Спасе, заблудившаго, * великия ради Твоя милости.

И прочее последование яко обычно.

Часы со обычным стихословием, и чтение Евангелия.

НА 6-М ЧАСЕ

Тропарь пророчества, глас 1:

Безмерно согрешающим, * богато прости Спасе, * и сподоби нас неосужденно поклониться * Твоему святому Воскресению, * молитвами Пречистыя Твоея Матере, * едине Многомилостиве.

Прокимен, псалом 129. Глас 6: Яко у Господа милость, и многое у Него избавление.

Стих: Из глубины возвах к Тебе Господи, Господи услыши глас мой.

Пророчества Иезекиилева чтение. [Глава 1, ст. 21 – 28. гл. 2, ст. 1]

Внегда идяху [животная], идяху [и колеса], и внегда стояти им, стояху [и колеса с ними]: и егда воздвизахуся от земли, воздвизахуся с ними [и колеса], яко дух жизни бяше в колесех. И подобие над главою животных яко твердь, яко видение кристалла, простертое над крилами их свыше. И под твердию крила их простерта, паряще друг ко другу, комуждо два сопряжена, прикрывающе телеса их. И слышах глас крил их, внегда паряху, яко глас вод многих, яко глас Бога Садаи: и внегда ходити им, глас слова яко глас полка: и внегда стояти им, почиваху крила их. И се глас превыше тверди суция над главою их, внегда стояти им, низпускахуся крила их. И над твердию, яже над главою их, яко видение камене сапфира, подобие престола на нем, и на подобии престола подобие якоже вид человекъ сверху. И видех яко видение илектра, яко видение огня внутрь его окрест от видения чресл и выше, и от видения чресл даже до долу видех видение огня, и свет его окрест. Яко видение дуги, егда есть на облацех в день дождя, тако стояние света окрест. Сие видение подобие славы Господни.

Прокимен, псалом 130, глас 4: Да уповаеи Израиль на Господа от ныне и до века.

Стих: Господи, не вознесеса сердце мое, ниже вознесостеса очи мои.

И прочее. Вкупе же поем и 9-й час, без кафисмы, и чтем Евангелие. И блаженны поем, и Помяни нас Господи, с поклоны. И прочее все, якоже и в Понедельник указася.